

麻城縣志卷之二

方輿第二

山川名勝附

龜峯山在縣東六十里一名龜頭山春秋吳楚戰于柏舉
卽此崇高爲合邑之望巖谷深秀靈蹟甚多詳名勝
四望山在縣東十五里山至險峻可以四望元末鄉人曾
斌聚眾結砦保障全活甚眾山澗有石洞名風洞每大風
起先響土人憑爲占驗後山洪石墜洞口遂塞通志
駐蹕山在縣東二十五里相傳唐王駐蹕於此

麻城縣志

卷之二

方輿山川

一

甌山在縣東三十里

遊蕩山在縣東三十五里相傳唐王遊此故名下有唐殿
今址無存

鷄籠山在縣東四十里僧無念建刹

小勅嶺山在縣東四十里均舊志

大勅嶺山一名赤嶺在縣東四十五里通志

雨流山在縣東一百里

什子山在縣東七十里攢巒插漢宋端平間徙縣治於此
後廢明季邑人避兵復結砦以居均舊志

邑人鄒知新什子山記山亦多險也曾有險如什子山者乎山峯排削山形叢嶮巖險甲邑中宋端平間徙立縣治於此避狄難也明崇禎乙亥後邑苦流賊鄉人復立爲砦至癸未春初外寇內訌騷擾日甚邑紳衿城居者盡移家於其上其峯峻家各爲砦其流長門各有井驢卸載肩卸擔人卸騎隻身斗粟喘氣孤登亘維者層巒含暉者松磴方晝陰曠他砦多日苦炎苦蒸時砦多寒未暝見星未冬見雪樹先秋凋花遲春發其時序之大槩然也阻雨食不勝奇冷衣不勝雲騰房牖戶綵綿不勝居者夏裘冬爐行者拄杖扶闕貧者畏避饒益者安棲焉昔閻防與永樂諸公夜泛黃河有忽與世人踈之句余謂泛黃河不若登什子山之踈世也

八疊山在縣東六十里在龜峯之南路盤折乃得踰上有亭有寺憩行人焉 通志

天井山在縣東八十里

麻城縣志

卷之二

方輿山川

二

剪刀山在縣東八十里山峯峭削望似剪形

鹿角尖山兩尖對峙有寺焉時旱人多祈雨於其間 均舊志

九歇山在縣東九十里高巖峭壁石逕微通往來者屢息乃逾 一統志

了杵山在縣東南五十里有佛寺僧無念習靜處

五龍山在縣南三十里有唐貞觀年間修建古刹 通志

白臬山在縣東南三十里一名白額山詳後名勝

鳴山在縣南三十五里有古寺其麓石壁嵯峨有洞居山腰昔道者於此辟穀化後無能入者

望花山在縣南四十里為往來通衢均舊志

雲陽山在縣南四十五里在鳴山側山勢西迤半皆平岡

曰青邱山鳥石山高峯山豹子山統名南山通志

大崎山在縣南五十里為黃岡縣界自八疊山鳳凰崖東

界嶺至此山勢皆崩劣其麓為小崎山為象棋山通志

靜明山在縣西十里

朱山在縣西三十五里崇禎季周宅結砦保聚其中全活甚眾

青山在縣西四十里上有石閣又西為大聖山均舊志

麻城縣志

卷之二

方輿山川

三

礦山在縣西五十二里中有古刹及龍王洞通志

胡鉉曉行礦山詩霜天朗映飛玉屑曙色將開半明滅嵐光冉藹行人稀屋角寒臯最饒舌晨鐘響雜松濤邊征鴻送客雙淒絕孤峯插漢翠烟浮老樹盤空留古拙策蹇長吟過板橋獨訪寒梅吸香雪

大安山在縣西二十五里中有古刹山椒名梅侯俗呼梅

花腦古刹北有石級名百丈階自七里岡至此踰白沙關

為宋時達汴之通道一統志

邑人梅國樓大安山記西陵之西百丈之陽鳶停鶴峙禪林出焉琳宮掩映寶塔嵯峨松徑紆迴石梁蒼鬱此大安之大概也予曾三遊其地矣荏苒年華消磨豪傑屈指同遊無一存者殊為悵然昔人之三遊積峯寺其初則禪榻定僧古樹棲鶴故曰松巢老鶴半江月僧在翠微開竹房二則僧化而鶴在焉故曰老鶴尚存松露

滴竹房不見舊時僧三則鶴亦去矣故曰惟有前峯明
月在夜深還過半江來余讀此詩若合符節始知今昔
異時而興懷寄慨其致一也因思秦漢盛時唐宋末路
朱門綺戶千萬餘邨物換星移黍離增嘆寺居幽僻兵
火不加猶然風雨漂搖年深寺廢况五侯池館畫棟連
雲三晉樓臺翬飛耀日尤回祿之所易加而山鬼之所
易闕也不則大半主人非矣乃知王謝堂前燕子飛入
人家平章宅裏蘭花東風落盡人事固然物理亦若是
矣天下之物有有必有無有聚必有散富貴繁華着身
來空卽是色卽山河大地都入胸中榮枯得失過眼去
色亦成空卽身世因緣皆爲苦海既入胸中何非吾有
既爲苦海何非吾無然則蕭寺之有者未始不無無者
未始不有也而據今之聚者未始不散散者未始不聚
也語云山川風月原無定主閒者爲主耳得成聲目遇
成色三千世界盡收萬丈維摩浮漚成幻泡影成虛百
萬連雲俱化寒灰烈燄世間萬事逢場作戲到處卽家
何必認其何者爲家何者不爲家耶今之學士大夫讀
書其地者未遇則不能爲既遇則不肯爲而素封巨室

麻城縣志

卷之二

山川

四

又以寺非吾有何田舍之不爲而寺之爲是不知有無
聚散之道而以華堂蕭寺分畛域也梅子老不欲官而
頗有遐外之想夷考昌黎之大顛東坡之佛印結方外
緣以怡暮景頃具待御熙陽疏而直委命於不佞得無
有意於方外緣乎因憶予與熙陽四十年前老友也方
其少壯時慷慨自許意氣相期登詞壇建旗鼓固一時
之雄也乃今頭白爲郎水邊竹下相對兩衰翁曾日月
之感何而舊遊似夢矣昔白樂天晚寓蕭寺偶聞鐘聲
起鐘聲動三十年前曉寺情余遊大安至今倏忽三十
餘年曾記古殿殘燈疏鐘杳靄僧歸月下鳥宿溪邊依
稀在目倘一再逢諒山林蕭瑟風景淒涼遺構荒蕪殘
僧零落爾夫鄰人之笛懷舊者感之斜谷之鈴溺愛者
聽之曉寺之鐘鍾情者賦之後之視今亦猶今之視昔
撫今思昔感慨係之
嗟夫此余曉寺情也

奉道山在縣西五十二里清風嶺之南中有蓮花石仙人

石風穴龍泉下有滴水崖

紫雲山在縣西七十里今界黃安下至岐亭

香山在縣西七十五里有古寺人多拜禱

九螺山在縣西南八十里岐亭鎮昔張愨子隱居於此自

號九螺山逸人以上通志

馬頭山在岐亭西南似馬回頭故名大河遠望為合邑水

口羅星向傳不可開鑿宜建塔一座以為一邑文峯新增

拘羅山在縣西產金腳蜈蚣為李時珍本草首稱又有了

頭山盡邑西境焉舊志

麻城縣志

卷之二

方輿山川

五

黃土山在縣西北五十里通志

五腦山在縣西北八里即張紫微侯飛昇處四峯環拱中

峯獨峙神祠據焉兼詳壇廟

道觀山在縣西北十五里烟霞夕照秋霽後尤為勝景舊志

周損和劉同人道觀山韻石淙鳴壑秋邱中日月遡

挈瓢下瓦亭飲水不飲渾清響寄山客白雲知秦全

靜聽泉夜心濯月漱芳潤復同劉翠植和前韻劉

子有小阮遲我續秋遯紫蟹盤殮充黃蝶菊叢渾洗

石石可讀汝力剔其全帶

水看筆法千年學淹潤

會龍山在縣西北四十五里上有古寺舊志

陽臺山在縣西北九十里舊志

羚羊山在縣西北九十里西南有分水嶺倒水分流之處南流爲艾陽寺河北流入河南光山縣界此山離城百里以產羚羊得名俗傳漢關索嘗養病鮑家莊於此山建花石砦故址猶存下有靈佛寺蝴蝶洞洞口極狹人行數十步上透天光可容百人又有乾洞風洞水洞狐洞穀倉鉄門坎洗腳盆仙人掌諸勝時產仙韭仙葱靈芝密臘金等物牧童樵子間有見而取之者

舊志附新增

霸王山在縣北十里俗傳西楚霸王項籍駐兵於此下有陂名霸陂傳爲飲馬處

通志

麻城縣志

卷之二

方輿山川

六

鳳嶺山在縣北十五里相傳有鳳集於此並詳名勝

仙居山在縣北十二里近有鳳凰巖下有仙洞石室雲泉諸勝昔麻姑棲以修真餘詳名勝

飛龍山在縣北三十里俗傳寺棟一畫龍飛去故名又傳夏月不暑無蚊山有井旱可溉田南爲薄刀峯仙姑洞道觀山皆層巒絕巘幽秀奇特

駱億山在縣北八十里山以人名下有駱家坂一名落衣山俗傳仙人落衣於此峯巒層疊發自界河羚羊山分水嶺

木陵山在縣北一百里上有木陵關樹木茂密岡巒鬱然
爲一邑要隘以上皆通志

蛇山在縣東北三十里

大腦山在縣東北三十五里體勢崢嶸卓然秀聳

雲霧山在縣東北四十里高撐天表常有雲氣往來

祖功山在縣東北二十五里均舊志

陰山一名鷹山隔河有鷄山對峙在縣北四十里懸崖千
尺登覽數十里皆在目前石級層累河水激衝上立陰山
關有洞口底深莫測一統志

麻城縣志

卷之二

方輿
山川

七

石門山在縣東北九十里

黃蘗山在縣東北九十五里上產茶筍萬厯間僧無念開
山建刹在商城縣界

風門山在路口區東北離城百里巍然獨尊楚豫諸山之
祖其分支層巒疊嶂北至商邑金剛臺南至縣東龜峯山
花石崖在縣東北三水灣崖竅玲瓏每杜鵑開時紅翠交
加有若錦屏云

燕子崖在縣東四十里唐殿側俗傳有燕子樓今廢

懸鐘崖在縣東北六十里孤峯萬仞河水激流術家所謂

地雄星遠望如鐘懸天半

李魏遊懸鐘崖詩雨過層巒翠漸生騎驢好作看山
行路緣曲逕渾忘險泉以幽奇不記名日午竹鷄啼
灌木夜涼松鼠跳鐙檠老僧指引無梁殿佛磬初敲
第一聲

君子崖在石鼓山之陰山頂有巖有石碗石曰

十丈崖在縣西四十里

均舊志

月望巖在七里陂區臨河陡絕十餘丈如半月形崖下石

洞深不可測道光間有龍自洞出白晝上升毫無擾害相

傳閱百餘年即有龍出焉

新增

萬仞崖在縣西四十里亦名萬人崖四面高峻中深曠俗

麻城縣志

卷之二

方輿山川

八

傳可容萬人故名元末邑人依崖立寨避難於此石碑上

刻有理問金理問銀證明等字士人往遊亦多題詩其上

今為佛寺 一統志

邑人胡翔霄萬仞巖賞雪記余居之西層巒疊起為萬
仞巖最勝境也癸卯冬端居多暇偕羣季散步林亭涉
宅後小溪水明瑟朗鑒須眉石衙衙立水中不可揭輒
縛木為梁劣可容足緣延乃得渡傍溪行彌望黃茅見
叢薄中老屋橫斜村落蕭索深巷寒犬吠聲如豹行王
六里抵崖麓拾級而上披羊裘攀絕峯頭恨不攜謝朓驚
視色界一切依稀李供奉登落雁峯頭恨不攜謝朓驚
人詩來搔首問青天耳少選黑雲壓城朔風凜然古木
怒號雪大如掌袍袖間皆有栗烈意余顧謂羣季曰斷
橋驢背踏雪尋梅此景最為曠絕我輩陟危峯步玉宇
興致清奇當不減王世懋眺岷峩積雪時也因共入茅
菴深處沽村醪三斗相對痛飲濡首大醉高歌白雲黃

竹之章空谷響應旁若無人仰視長天琪花舞空飄飄
墜帽席間樹末寒鴉聞人聲皆拍拍驚起是日也余心
最懼昔宋錢文僖守西都謝絳歐陽修同在幕下一日
遊嵩山自穎陽歸幕抵龍門俄而雪作登石樓望都城
各有所懷歎烟靄冥濛有車馬渡伊水來諦之則文僖
遣厨載歌妓至語曰山行良佳少留龍門賞雪無遽歸
也迄今以為佳話余長年株守丈夫三十尚如此頭顱
摧撞息機無所可用乃復寄情山水徒強顏耳回視龍
門故事類不得同日語雖然予竊有軒渠焉世之赫者
熾獸炭擁璣璣日暮入銷金帳飲羊羔酒豈肯立千崖
萬壑中試此不龜手藥耶余昆若季天機清妙煮雪烹
茶甘作此冷淡生活為黨家姬所笑非徒為茲崖破寂
又以歎世之趨熱者之多而飲冰嚼雪之難其人也
邑人胡鉉秋登萬仞崖詩著屐登高花滿蹊五雲飄
縹碧峯齊鳴秋綠竹千條韻到眼黃茅一望迷依逕
老蛩終日語窺人閒鳥偶然啼徘徊欲到斜陽道紅
葉飛來送我西

麻城縣志

卷之二

方輿山川

九

石城砦一名石子岩在縣東四十五里三面壁立一逕斜

通明季人多保聚焉

通志

七里岡在縣西三里宋縣令張毅植松處詳名勝

梅花腦在縣西北四十里亦名猴山

道觀磯在五腦山左谷中觀廢近有僧菴

均舊志

邑人鄒知新道觀磯記磯去縣北十里許上懸崖下幽
潭一溪深流遊人溯洄從之但見夾岸松陰修篁映日
如入武陵源中無復知有人間世飛瀑如練曳於磯巔
邑人邱長孺先生構亭磯側鑄其句於亭云石水生茶
味松風滅扇聲遊人欲窮磯源往往不憚險巖攀蘿捫
壁尋焉俯視疑亭立波底仰視疑波出磯底磯峽逼窄
封以丸泥瀑為斷聲移時決之則雪浪噴花縱躍有干
尋之勢洪洞鞞鞞振林谷峭壁如幅驟看不過寒山

片石耳熟視良久有點畫隱躍苔蘚間挽水澆之則詩句井然爲宋人黃權攜家過此留詩石壁云詩載藝文志中去磯下數十武今有觀存亦幽雅宜人非古觀也古觀基在磯頂平處

春風嶺在縣東九十里一名東界嶺輿地紀勝云春風嶺

多梅花蘇軾自新息渡淮道經此嶺 一統志

宋蘇軾過淮詩朝離新息縣初亂一水碧暮宿淮南村已渡千山赤驛號古戍霧雨暗破驛回頭梁楚交永與中原隔黃州在何許想像雲夢澤吾生如寄耳初不擇所適但有魚與稻生理已自畢獨喜小兒子少小事安佚相從艱難中肝肺如鐵石便應與晤語何止寄衰疾
梅花二首春來幽谷水潺潺的皜梅花草棘間一夜東風吹石裂半隨飛雪渡關山 何人把酒慰深幽開自無聊落更愁幸有清谿三百曲不辭相送到黃州 又詩春風嶺上淮南村昔年梅花曾斷魂豈知

麻城縣志

卷之二

方輿山川

十

流落復相見蠻風颯雨愁黃昏長條半落荔枝浦卧樹獨秀桄榔園豈惟幽光留夜色直恐冷豔排冬温松風亭下荆棘裏兩株玉蕊明朝暎海南仙雲嬌墮砌月下縞衣來叩門酒醒夢覺起繞樹妙意有在終無言先生獨飲忽歎息幸有落月窺清尊

胭支嶺在縣北三十里

東風洞在縣東六十里龜峯望龜亭石疊峻峭深窅不可

測投石其中東風即起

仙女洞在縣東南三十里白泉山上

花石洞在縣西北九十里羚羊山洞逕暗通雙門山約十

餘里元末鄉人於此避兵 以上舊志

麻姑洞在縣北十二里詳名勝

石洞在縣東龍湖之側石洞道人隱居處

徐家麟和曾龍湖 石洞八景詩 晴嵐疊翠洞門
 闢處萬峯青一幅天然展翠屏縱使白雲橫掃斷螺
 尖幾點遠亭亭 石澗流泉一溪清瀉響潺潺供給
 幽人枕此山絡石縈林無限意終教岩壑不能關
 白雲繞洞觸石浮空奇復奇洞門晴日有時迷白衣
 蒼狗尋常事此物須臾未足齊 竹雨含煙煙雨蕭
 蕭擁萬竿主人無客獨相看此中有好應難道不獨
 逢君在歲寒 秋月穿林洞口山高月較遲素輝旋
 看上疏枝分明露冷霜清夜卻是空林瑩徹時 庭
 桂飄香木樨消息少藏遮歲歲山窗馥碧紗門外遊
 人無覓處不知深洞足幽花 松濤夜聲夜酌幽齋
 洗破觥松風萬壑送希聲道人醉卧驚濤外不曉山
 城長短更 懸巖積雪巉巖干仞立何孤留得寒冰
 映玉壺笑指堅凝難化處可能一點入爐無

麻城縣志

卷之二

方輿山川

十一

水仙洞在細楊區上分洞外有澗水流如瀑內乾燥可容
 七八筵避難者多入此 新增

卧龍石在縣東三十里盤曲蜿蜒 舊志

垂山水 水經注垂山水北出垂山之陽與弋陽淖水同

出一山水之東有南口戍又南逕方山戍西西流注於舉

水 一統志在縣東今名柏塔河 舊志柏塔河亦名界

河出光山縣界逕黃土關外南流又逕縣東北三十里又

南逕縣東至縣南合桃林河為縣前河有二源一源商山

之西界嶺兩路口山南流為杜家河福田河 府志謂二河水注之未晰

逕虎頭巡檢司署前又南逕石香爐抵陰山水作四折名

四道河

府志謂四道河水注之未晰

南抵洪家河會於白塔河一源光

山之東界逕黃土關南流爲乘馬崗河上馬河南東爲白塔河會洪家河逕蘇坑抵小河頭小溪之水注之又南北沙河之水注之合流縣東新河初分復合逕城東抵高岸河

舊志

舉水 水經注舉水出龜頭山西北流逕蒙龍戍南又西流左合垂山之水又西南逕顏城南又西南逕齊安郡西倒水注之又東南歷赤亭下謂之赤亭水南流注於江謂

麻城縣志

卷之二

方輿山川

三

之舉洲 一統志源出縣東北黃蘗山西南流入黃岡縣界三十里入江在縣名岐亭河其入江處爲三江口 寰宇記岐亭河在縣西北八十里 舊志舉水源出縣東北西南逕虎頭關陰山坂南逕縣東十五里爲閻家河以岸多桃花亦名桃林河折而西會柏塔河縣東河卽閻家河有三源一源商城之石門山逕石門坂至陳朋坂一源黃蘗山獅子峯左逕高山響水潭與石門之水合爲三河口西流黃土嘴逕釣魚臺爲閻家河一源獅子峯右榮家山細分水嶺逕鳳凰山三水灣西抵永興洲與閻河水合南

至古城下東坡河桃林河之水注之西折至高岸河與縣前北河合稍西匯麻溪白蘘二河又西南會浮橋河又西南過宋埠至岐亭鎮合松溪河原出黃安縣界名岐亭河又西南逕黃安縣界南入黃岡境注於江一統志

倒水 水經注倒水出黃武山南逕白沙戍西又東逕梁達城戍西東南合舉水 一統志在縣西今名浮橋河源出羚羊山分水嶺右流為張店河林店河長潭南沿艾陽寺名艾陽寺河東折逕西陽鎮會東山支流抵沙灣下為浮橋河又南至金家河夾沙洲河為兩河口與縣河合舊志

麻城縣志

卷之二

方輿山川

三

以上三水畧見水經注雖千數百年稱名屢易而水道尙可辯識故列於諸水之首

新溪河在儒學前舊有泮池成化癸酉因水衝激成溪築長堤植柳合流縣前河舊志

新河在縣東一里一統志明正統末縣令王世祿以縣前河匯諸水恒有暴漲之患議於河之東岸鑿河以殺水勢孝廉萬祥捐貲募工至嘉靖初縣令杜朝紳始成之名曰新河至縣南仍入縣前河通志

高岸河在縣南十里鋪合桃林河下岐亭入江

閻家河在縣東十五里俗傳唐洪州都督閻伯璵所居舊
臨河上故名舊志

桃林河在縣東十五里岸多桃花故名源出雁門山自遊
蕩山右逕上河抵四望山與閻家河水會自為一派舊志
叙舉

水為閻家河下名桃
林河似以二為一

橫河距縣東六十里源出大崎山之黃泥坳下為磨子河
逕鄭山西流為沙河入黃岡界抵方一渡西南入於江通志

木樨河在縣東九十里源出商城界嶺南逕羅田界又南
至黃岡縣入巴水通志

麻城縣志

卷之二

方輿
山川

古

義州河在縣東一百里源出商城界長嶺關分水嶺南流

逕白水坂入巴水又南入於江通志

高岸河在縣南十里即縣河之下流有洲焉以砥之閻家

河東注焉舊志

麻溪河在縣南二十五里源出龜峯右逕唐殿沿盧家河

朱家河抵方家口西過林家寨入汝陰河通志

白杲河在縣南三十里源出龜峯山左折為曹家河鹽田

河逕鳴山之麓白杲西歷楊家嘴北為汝陰河合縣河統志

黑龍池在縣東南三里有小溝以入河詳名勝

化龍池在縣西十里樊家橋俗傳巨鯉化龍

以下舊志

龍池在縣北門外距城僅數十步

黑龍潭在縣東十二里又北宋杜區有黑龍潭云與光山之紫龍潭相通相距二十里

響水潭在縣東五十里河中亂石叢立每春夏水激聲聞四五里又栲栳潭

響龍潭在縣南十五里白泉山飛泉瀑布百十丈時響如伐鼓聲天卽雨旱則土人競聽之

龍孔潭在縣西十五里岩有石穴水半浸焉潭深莫測

麻城縣志

卷之二

方輿山川

五

烏龍潭在縣西三十五里有小泉雖旱不涸

螺殼潭在縣西六十里宋埠右側

瀉油潭在縣西六十里

永興洲在縣東十五里緊附閻家河之東大水漲溢遷徙靡常每秋冬水涸亦爲市集

夾沙洲在縣南十里東北河會處地卑而水不能浸民多保聚焉近比屋植桃一勝景也洲闊里許長三四里水打

蔡家園麻城出狀元俗傳在此

通志

夾洲在縣西三十里縣前河與浮橋河會處闊三四里長

十餘里其土沃其民勤耕耘種植桑麻木棉稱饒足焉舊志

中洲在縣西南七十里岐亭之南二水中分林木茂密為

一邑砥柱統志

張家洲四面濱河乃合邑水口處又為一邑印星東有飛

沙嶺遠障西則平地撐紅石一座咸以為中洲鎖鑰云

牛陂湖在縣東十里

丁家湖在縣南一里

三角湖在縣南二里

七里湖在縣南三里

麻城縣志 **卷之二** 方輿山川 共

北菱湖在縣北五里

南湖在縣南十里

官湖在縣西十五里七里陂

草坡湖在七里陂

謝家湖鄧家湖在新店畝

西南湖在宋家埠河之南

梅興港在縣東十五里

楊家港在縣東十五里

楊林港在縣西四十里

白雀港在縣東南五里正白田畝產蓮芡

義井在縣街大旱不涸久雨不溢冬溫夏涼若有義焉
官井在縣左街其味清冽

清泉井在儒學前取淘盡沙泥方見清泉之義

仁愛井在城隍廟右知縣王世祿開鑿民懷之因名

縣井在縣丹墀知縣杜朝紳鑿

青陽井在西門陽基塘右

胡家井在北門

甘露井在南關外其味甘清

麻城縣志

卷之二

方輿
山川

七

相公井在西關相公廟

廟門井在北關東嶽廟左

以上舊志

冷水井在魯家區四時有水湧出遇旱能灌救田畝

泉水井在縣北三十五里楊柳河路側行人爭飲水味芳

冽夏則清冷冬則甘溫

霧仙井在縣北六十里虎頭司之後井旁有祠遇春夏雨

時井中先有雲霧滃鬱故名

新增

附府志麻城縣縣前河有二源一出河南商城縣之西
界至兩路口杜家河之水注之又南福田河之水入焉

逕虎頭司卽霧仙鎮張店河之水注之又南逕石香爐
鄔家河之水入焉又南逕陰山阪四道河之水注之岸
側石峯壁立中有石洞遊人登覽景趣非常一出光山
縣之東界嶺經黃土關南爲柏塔河又南合陰山阪河
逕縣治東分而爲二一名新河前邑令督民疏鑿以殺
水勢也至城南復合爲縣前河又東與舉水合按此卽
水經注
之垂水縣前新
河今已就湮
舉水源出縣東北之龜峯黃蘗等山卽吳楚戰於柏舉
之地因名焉至縣東與源出河南商城縣石門山之閭

麻城縣志

卷之二

方輿
山川

六

家河合閭家河下流名桃林河舉水又西南流爲高岸
河白杲河麻溪河合汝陰之水入焉又西爲螺壳潭又
南逕宋埠源出分水嶺經艾陽寺下爲浮橋河之水注
之又西逕岐亭牙魚坑石頭背之水入焉又南爲柳子

港卽黃岡縣界

按分水嶺下浮橋河
卽水經注之倒水

又水經注淮水出黃武山東北流木陵關水注之水導
木陵山西北流注於黃水又逕晉西陽城南又東北逕
弋陽郡故弦高國也此爲麻城西北鄉分水嶺之水北
流入豫境者蓋與倒水同出一山
南流者出江北流者入
淮分水嶺卽以此名云

謹按麻城之山自北而東龜山最高實爲羣山之望其脉絡則自羅山縣南黃安縣北之陽臺山蜿蜒旋折東至本縣路口山是爲縣之北界縣前河出焉又東爲石門山閻家河水出焉又東爲黃蘗山垂水出焉而龜山實峙其南峯高三十餘里廣袤七十餘里上凌霄漢下則舉水出焉西流合垂水再西南流入倒水以達於江此龜山以西之水皆見水經注所謂出舉口者也龜山東北爲長嶺關下爲東義州故城義州河水出焉長嶺南行爲龍王尖五斗寨角叉山

麻城縣志

卷之二

方輿山川

六

至豹腦巖而止義州之水隨山曲折下爲木樨河與松子關之水合再下爲二里河與英山羅蘄之水合均會尤河注巴水以入江此龜山以東別支之水也由龜山而南爲八疊山又南爲東界嶺過大崎山以入黃岡境山勢抵郡城聚寶山而止計自龜峯至郡山程一百三十餘里大江橫繞府治建焉由龜山而西爲遊蕩山又西爲四望山又南爲白蘗山卽白臬山亦作白額山及鳴山黃家山以迄縣之南境其迤邐於南界而西屬岡安者爲象棋山雨流山雲

霧山中爲望花山五龍山張師腦覓兒山青邱山東
獨山高峯山豹子山而萬松諸小山附焉 由龜峯
而東爲什子山囊山白龍池山馬牙山稍南爲雲霧
觀五峯山銅斗岩獅子岩箔金寨以抵黃岡之東界
縣西北之山多與光山黃安聯屬正北者爲修善
山鳳嶺山與陰山祖功山隔溪相對轉西爲木陵山
木陵關在焉又分爲駱億山飛龍山仙居山至霸王
山有小溪以界之自西而南爲會龍山啄木山薄刀
峯道觀山麻姑洞五腦山至近城而止正西者爲黑

麻城縣志

卷之二

方輿
山川

三

石寨羚羊山分水嶺倒水之所出今名浮橋河舉垂
二水東來會之經岐亭繞黃安黃岡之境合紫檀河
出鷺公頸以入於江鷺公頸者卽水經注之舉口也
倒水之西爲萬人崖范家岔管山青山朱山梅花
腦大勝山九螺山西峯山馬頭山直極黃安南界及
黃岡之西北界

附名勝

按舊志有三臺八景之說僅載圖於卷首而志中
未詳閱者膏焉麻邑名蹟勝遊雖未能若瀟湘八

景燕臺八景之天成雄秀然龜峯山麻姑洞萬松亭諸勝古人載記已多著錄不可沒也因彙存以資攷證圖仍舊載

白雲臺 臺在縣西仙居山有石隆起上平如臺時有雲氣往來其巔高瞻遐眺縹緲繽紛鳳翥鸞騰真靈宛集相傳爲麻姑遊行之所

雁臺 臺在縣東白堊山之南有石平坦如席釋道一修真山早晚率沙彌課誦於臺上梵唄一聲羣雁下集生公說法頑石點頭道力與佛性均作如是觀

麻城縣志

卷之二

方輿名勝

三

釣臺 臺在縣東二十五里鳳陂河兩水夾流巨石突起於河中縱橫各三丈許明季邑人周柳塘建寒碧樓於臺上暇則垂釣其中旁有環竹蓬沙潭漁岬撻雲洞柏塢小赤壁松邱耦耕谷諸勝其左爲龍湖寺李卓吾講學處晨夕過從稱一時高軌數百年來歷劫滄桑風流閔寂披裘誰是惟此石巋然獨存

周思久釣臺記去家二十里而近有湖前瞰龜嶺後枕玉山左右重岡抱若城郭蓋勝境也有石形類大龜蹲水心橫三丈許縱倍之居士結茆其上覆土種竹爲門徑雜以花卉湖每遇雨漲水激石怒號如噴雪濺珠咫尺不聞人聲迨流減浪平鷗浮魚躍居士則載酒掉一葉舟歌漁父辭極所往而後返人望之者以爲仙島也

廳事外構小篷竹中日環竹篷篷右出衡門降階盡石
徑曰沙潭潭前日漁岬潭右渡畧約而西曰撻雲洞洞
口盤旋上至絕頂曰柏塢出塢東臨水巖勢斗絕曰小
赤壁由赤壁隴行百餘步曰松邱由松邱踰嶺下則透
迤深窳耦耕谷在焉乃耿伯子楚侗所題也居士生平
好漫遊足跡幾徧寰宇每遇佳山水輒思卜築未能也
乃今不出鄉園而得之日與二三子棲遲於茲追琢頑
鄙方欲囊束經史毀棄筆研散愁人間寓樂象外反之
吾身神理滾滾不可羈閣乃知出入口耳者遠也吾老
矣倦遊將依茲湖而休焉以畢此生則釣臺亦若起予
者矣因捉筆記之

李中黃宿釣魚臺梅花吟云仙人種雪仙姝廟仙姝
采之惟月照月將雪影入西窻知是仙姝夢魂到曉
風冷露空中溼香帶羅裾悄獨立巫山高高第幾峯
月上更深朝太乙

周錫晉秋日同友人遊龍湖釣魚作十年會上釣魚
磯別後星霜夢亦稀粉壁尙留蝸篆在夕陽誰逐雁
行歸當時只覺逃名是此日翻疑學道非落木空山

麻城縣志

卷之二

方輿
名勝

三

秋日裏翰君
詩律得精微

龜峯旭日 龜山峻極高聳上出雲中自麓陟巔二十五

里山有人跡石相傳爲唐真應禪師立化處馬跡石爲南

唐元宗駐蹕處又有觀音巖棋盤石噴雪崖試心石虎跑

井白龍井黑龍井諸勝而龍井禱雨頗應上有化主廟相

傳神卽宋邑令張毅旁有合掌石有題名二行一行刻熙

寧三年七月張公入山祈雨偕江西進士吳弼山僧圓喜

賦詩一行刻熙寧五年十月張公偕江西進士蔣著山僧

圓喜靈寂話別字每當秋高雲淨登龜山頂望江漢如匹

練而於夜半觀日出尤奇扶桑動搖海水吞吐金蛇萬道射目蕩心固無俟侈談泰山日觀也

休寧程南金龜峯詩萬峯峯色一峯前上天下天雲
茫然佛磬數聲落空寂松花五月飛寒烟江晴欲辨
鸚鵡草日暮恐來瀟湘仙夜半呼龍伴清骨短衣聊
對石牀眠

邑人董應軫龜峯詩名山雄峙邑城東天落蓬萊第
一峯掃地曉嵐堆翡翠倚空晴嶂削芙蓉琪花逼暖
春香放瓊樹凝輝夕霧濃應有神靈產申甫詩人寧
獨美喬崧

邑人梅圻龜峯詩芙蓉直接雲烟裏一山未盡一山
起巖松伏石石生花松聲半落在天涯藤蘿結樹靈
幽寄碧光滿身身帶翠藥苗細雨忽如秋峯影沈潭
在水流寒光入戶飛片片南望瀟湘皆不見

邑人周禮贈龜峯修一老僧詩奇峯二舍渺難登少
日曾攀萬仞藤試問師居何所是答言身在最高層

麻城縣志

卷之二

方輿名勝

三

邑人程九萬龜峯行羣峯羅列連雲起矯首獨瞰青
雲裏靈鍾氣盛脉絡分蜿蜒起伏瞭如指循途漸近
合掌石一石中分屹峙不傳巨靈擘此奇鬼斧神
斤何爾爾時方小憇復前行透迤躡躑心懸旌路人
為指荒山寺於茲履道得其平尋僧細語茲山境面
羸危峯如延頸十步九折繞還登偕行接踵殊難騁
後人首承前人腰前人足近後人領躡躑拾級喘差
停指有方石升名井胡為泉冽不可竭掬來一吸三
清冷攀登歷險正岩嶢據石攀芳辨藥苗呼龍瑤草
種何處秋桂春蘿色欲凋紅樹千重野花馥涼風颯
颯葉蕭蕭霧重雲深但一色俯視焉知近與遙繭足
捫蘿屐如跛寂寂山靈應笑我我本楚狂人牢落名
場愁還鎖振衣千仞片時間舉頭天外何坎壈有時
疲軟藉苔衣枕石頽然更危坐亭亭巨石插青冥靈
山變相無不可何年遺植兩蒼松越此羊腸足可容
巖壁大鐫一卷石古詞斑駁半無踪繞左乃抵白菴
寺登高造極失前峯古寺荒涼鐵瓦破頽垣禾黍草
茸茸厥明晨起謁山神烏紗綰綬碧金身慨想神明

張邑宰宦成采鍊住能仁要惟功德庇民社迄今遠
邇奉明禋更向峯前賞奇態坡下虎跑井宛在涓涓
泉出日盈盈碧鑑鬚眉殊可愛跣行捫石看棋局石
上題詩蘇長綵伏行前上可數武崖忽嶄然低且曲
低且曲延長陡削氣方束石筍橫排不許長插石虬
松遞相屬突起前峯百丈餘拔地倚天看不足北來
掉尾亦凌雲猶遜頭顱天可觸長年夜瞰海天紅旭
吞初日盱駭矚大別山高萬古風光生殘夜升朝旭
邑人徐家麟龜峯次曾太史龍湖先生韻四首歷險
捫奇訪古仙巉巖百尺一筇前因休倦足留中道已
覺騰身到半天峯勢千層馳巨浪人間一片浸長煙
懸知絕頂尤奇甚不造雲端肯擬還登臨何異小
遊仙俯視羣山萬仞前夕照多時留絕嘯明燈幾處
動遙天寒侵枕席都如水嵐染衣裳只似烟到此自
然塵累淨卻看倦鳥盡知還自笑才華遜謫仙名
山清興更無前振衣直上千尋壁舉手來捫尺五天
奇怪愕人懸磴石模糊留客宿巖烟夜闌更起看朝
旭指點湖山丹九還不是山中無漏仙還尋曲逕

麻城縣志

卷之二

方輿

古

下峯前狂吟敢望留千載凡睡居然落九天下界村
墟生暮靄上方鐘磬出蒼烟遲歸又借山家宿爲道
會從雲外還
邑人鄒光庭登龜峯詩突撐巒嶂倚雲端石磴何辭
拾級難海上暉騰峯頂見洲邊草長霧中看老松野
鶴千年在破衲山僧五月寒欲出狂歌心膽怯仙人
頭際正驂鸞萬峯齊伏一峯尊俯視峯層若水紋
枯樹半開紅葉隊午烟遙入白雲羣石留馬跡應飛
渡人在龜頭信創聞日暮最難憑眺處晴霞片片出
江濱
邑人陳發祥龜峯道中作盡力巉崖上扶僧問影形
路從樵子得聲畏野猿聽臨水春香碓捫蘿繡石屏
穿林深入處書壁以爲銘又龜峯秋月詩指顧靡
窮處何曾景色齊登山忘著屐取月漫勞梯煙染松
枝翠天連漢水低偷閒成逸興
夜靜冷雲迷

白泉飛泉

白泉山奇峯巒怪石巉削釋道一曾立三

教堂於是山分上院中院下院中院有藏經樓側爲道一
壩雁臺卽在其下俗傳山象人形上爲頭中爲腹下爲兩
膀遙望儼然山頂有石壁泉從罅出稍下爲石所截激怒
有聲噴玉濺珠不可遏止飛白半空千丈一落匡廬瀑布
不復奇矣

蘄州顧景星白臬山詩雲破碧嶙峋沿溪屢問津亂
泉晴似雪白石遠疑人康樂非無屐華陽亦有巾平
生樂山水偏與困風塵

邑人程九萬秋杪登白臬山詩望中白臬千尋峙二
十年來始一遊紅葉滿林如笑客黃花卧谷各爭秋
三生自昔徒聞語一壑何能畢所求回首花山煙霧
合此身疑已在丹邱

麻城縣志

卷之二

方輿
名勝

三

麻姑仙洞 洞在仙居山之腹東晉時後趙將麻秋女麻
姑修真處事詳仙釋山水幽邃林木秀蒨溪曲峯環步步
入勝山半爲靜月寺由寺左坡陀而升過一亭更上始至
洞懸石支架中空如屋底一池時有神魚遊泳其中泉水
清冽靈乳時滴用以瀹茗不減惠山洞背有平臺方廣十
笏昔仙子跌坐處東南諸峯護若列屏西北則雲煙繚繞
彌望無際洞口爲小龕右側一亭可以憩息凡四方名流
及都人士之選勝至者無虛日

邑人李巍麻姑仙洞賦并序攷志邑城爲後趙麻秋所
建是日麻城秋督工子夜不輟其女麻姑惻然憫之僞

作雞聲冀父之聞聲罷役也秋覺而答姑姑遂逃入邑
北白雲臺之石洞以居焉後得仙去即今之麻姑洞也
賦日出北郭之透迤兮聳層巒之岷岷兮隱茂林之翳
蔚兮森幽壑之深秘兮雜野花之的的兮吹涼風之淅
淅兮掛懸巖之蘿薜兮響深樹之磔格兮乳靈竇之絡
繹兮儼秋雨之滴瀝兮黯古洞之岑寂兮緬仙妹之遺
蹟兮既徘徊而太息兮轉欷歔而塞默兮當其息心泉
石鏡志煙霞既投簪珥載謝鉛華聽荒雞吟冷助長宵之
之月愁夜雨兮魂飛雉堞之笳寂寂蛩吟冷助長宵之
課絲絲燈影了無世外之嗟玉骨兮撐老古藤烟徑冰
心兮空殘潭水桃花惟渴飲兮雲液亦饑餐兮胡麻祇
形影以相弔無塵夢之來譁迨乎珊珊環珮響入遙空
冉冉銖衣駕言海東控白鶴兮別洞中之瑤草乘紫鸞
兮謝嶺上之喬松朝遊雁宕暮踏龜峯詣青母兮談元
向碧霞兮持幢訪雲英於月窟謁飛瓊於珠宮飄彩幡
兮玉女奏仙樂兮金童開宮扇兮丹鳳銜寶鼎兮虬龍
逍遙物外其樂融融爾廼仙姝蟬蛻遺像雲封蕙蘭芳
兮洞口馥杜鵑發兮洞外紅烹雀茗兮吸洞中之水苔

麻城縣志

卷之二

名勝

三

人語兮傳洞裏之鐘宛蜴蜥之游衍兮翻細鱗之赤脊
儼猿猱之升眺兮戲松鼠之騰風固已極遊觀之勝概
豈徒瞻仙子之遺踪也哉亂曰若有人兮踞山頭風鬢
雲鬢渺難求白雲長鎖山邊路丹竈荒唐澗水流
明邑人梅國樓麻姑洞詩捫苔履雲根山中眾鳥靜
背寺入松陰紆迴始登嶺麻姑亦云遙蕙蘿垂舊影
峭壁細鳴淙香泉尚澄井石龕洞口幽掬手飲清冷
風吹春氣颺芳馨結日永緬懷山水遊移情隨意領
呼響叩孤鐘聲聲動斜景
明邑人周之夫九日遊仙姑洞詩幾年愁劇廢登臨
且載新愁自眺吟環珮千秋留色相山川九日敞清
陰天河何處通涓滴地勢偏能擁巘峯俗物偶來堪
敗意忽驚潦倒十年心紫蓼丹楓野色濃不辭連
騎躡仙蹤白衣送酒逢佳士翠葉牽風對舊松石室
直疑神斧劈山僧常得冽泉供黃金大藥無尋處歸
路煙嵐引暮鐘何期風日縱重陽登覽爭誇野趣
長小友老朋友都健在漱流枕石自伴狂仙祠高出藤
蘿外游袂常霑薜荔香清酒百壺纔送到聊將酬醉

答秋光 喚得窮交共嘯歌俗情澹盡謁仙娥飛泉
石罅淙淙細落葉秋深漸多丹竈已隨雞犬去青
山如待鳳鸞過幾因蠟屐處便欲衣裳老芰荷
邑人周應曦麻姑洞詩繫馬攀崖尋洞口野花叢竹
亦荒涼潺湲玉液下幽壑迢遞藤蘿穿石牀烟繞翠
微疑羽服風敲黃葉想鳴璫可憐書信寂寥久空有
玉壺仙醞香

麻城縣志

卷之二

方輿

名勝

邑人徐家麟聞諸公遊麻姑洞走筆寄丁惠疇詩白
雲深處麻姑洞二十年前一振衣塵事相牽仙夢杳
素心雖在舊遊違山中太古誠何似眼底殘春逐漸
非多少攜觴游賞客無緣攀附到林霏 遙想春深
古洞旁杜鵑爭放野雲香貴遊肯爲看花至老宿多
因淪茗忙紅葉漸稀山漸寂清和初近晝初長會須
共挈匏樽往酌取清泉一再嘗

萬松古亭

亭在縣西七里昔宋邑令張公毅植松萬株

於西岡立亭其間爲觀風之所蘇子瞻倅黃時過此有詩

詳見東坡詩集時代旣邈陳迹就湮文字流傳勿虞翦伐

至明天順中邑人董應軫嘗重建之旋亦圯廢今惟書院

存萬松之名

宋蘇軾萬松亭詩有引麻城縣令張毅植萬松於道
以底行者且以名其亭去未十年而松之存者十不
及三四傷來者之不嗣其意也作是詩十年栽種百
年規好德無人助我儀縣令若同倉庾氏亭松應長
子孫枝天公不救斧斤厄野火那憐冰雪姿爲問幾
株能合抱殷勤記取角弓詩

宋孔常父過萬松亭詩鬱鬱青山夾路松行人笑語
綠陰中排雲架壑無餘地灑面侵襟有遠風一日勞

心非欲逸千年流惠亦何窮我來俯仰尋遺愛更喜清虛萬慮空

邑人王琬萬松亭詩二首植翠欲千尋蒼龍護路深借枝棲伴鶴分影奏瑤琴結綠何知午垂青不辨黔一株留道左猶憶舊棠陰亭址荒涼處猶存一木支龍吟驚轍濤擁覺秋遲影欲摩霄綠材成傲雪姿不愁斤斧盡春入長孫枝

桃林春色 桃林在縣東十五里地名桃林河夾岸多桃

花延亘十數里居民村巷羅錯花時紅霞如錦茅檐竹舍掩映芳華覺武陵源猶在人間也

柏子秋陰 柏子塔在縣東北二十里九龍山相傳為唐

德宗時虛應禪師所建塔高九丈九尺莊嚴寶相千載雲

麻城縣志

卷之二

方輿名勝

三

封其頂覆以鐵鑊有柏樹盤生於中每於立秋日午時塔四面無影夙傳中州有塔每日中無影論者或謂即土圭

正景之義茲塔獨於立秋無影亦一異也

鮑水宋祖法春暮眺柏子塔詩羣山開氣象表表立千尋不識亭松路猶瞻刹柏林有心來日午無影問秋陰石上徘徊久飛花一寸深邑人陳發祥登柏子塔詩多少悲涼處猶留此一岑感懷在薄暮景色重秋陰作賦才慚短登高意卻深斷碑尋不見孰識古人心

鳳嶺朝雲 鳳凰嶺在縣西北十五里麻姑洞之側相傳

有鳳集此朝暎未升晨霞初啟晴絲鬢鬢若烟非煙真不

啻巫山神女峯也

龍池夜月 黑龍池在縣東南三里許池水清瑩如碧玉
舊傳有驪龍睡此浸月如珠禱雨尤著靈異每值望夜冰
輪圓湧皎潔異常人立池邊清鑑毛髮光明淨澈如行玻
璃世界中

麻城縣志

卷之二

方輿
名勝

完

